

四庫全書

子部

欽定四庫全書

子部  
經濟類編卷六十五

詳校官中書臣瞿 照

主事臣祁韻士覆勘

總校官知縣臣繆 琪

校對官編修臣沈清藻

謄錄監生臣祝廷莖

欽定四庫全書

經濟類編卷六十五

明 馮琦 馮瑗 撰

武功類十一

教士卒

十一則

呂覽簡選篇 世有言曰驅市人而戰之可以勝人之厚祿教卒老弱罷民可以勝人之精士練材離散係系可以勝人之行陣整齊鋤耰白梃可以勝人之長銳利

兵此不通乎兵者之論今有利劍於此以刺則不中以擊則不及與惡劍無擇為是鬪因用惡劍則不可簡選精良兵械鋩利發之則不時縱之則不當與惡卒無擇為是戰因用惡卒則不可王子慶忌陳年猶欲劍之利也簡選精良兵械鋩利令能將將之古者有以王者有以霸者美湯武齊桓晉文吳闔廬是矣殷湯良車七千乘必死六千人以戊子戰於鄗遂禽移大犧登自鳴條乃入巢門遂有夏桀既奔走於是行大仁慈以恤黔首

反桀之事遂其賢良順民所喜遠近歸之故王天下武  
王虎賁三千人簡車三百乘以要甲子之事於牧野而  
紂為禽顯賢者之位進殷之遺老而問民之所欲行賞  
及禽獸行罰不辟天子親殷如周視人如己天下美其  
德萬民說其義故立為天子齊桓公良車三百乘教卒  
萬人以為兵首橫行海內天下莫之能禁南至石梁西  
至鄆郭北至令支中山亡邢狄人滅衛桓公更立邢于  
夷儀更立衛于楚丘晉文公造五兩之士五乘銳卒千

人先以接敵諸侯莫之能難反鄭之坪東衛之敵尊天子於衡雍吳闔廬選多力者五百人利趾者三千人以為前陣與荆戰五戰五勝遂有郢東征至于庫廬西伐至於巴蜀北迫齊晉令行中國故凡兵勢險阻欲其便也兵甲器械欲其利也選練角材欲其精也統率士民欲其教也此四者義兵之助也時變之應也不可為而不足專恃此勝之一策也

管子入復桓公曰終歲之租金四萬二千金請以一朝

素賞軍士桓公曰諾以今至鼓期於泰舟之野期軍士  
桓公乃即壇而立甯戚鮑叔隰朋易牙賓胥無皆差肩  
而立管子執枹而揖軍士曰誰能陷陣破衆者賜之百  
金三問不對有一人秉劍而前問曰幾何人之衆也管  
子曰千人之衆千人之衆臣能陷之賜之百金管子又  
曰兵接弩張誰能得卒長者賜之百金問曰幾何人卒  
之長也管子曰千人之長千人之長臣能得之賜之百  
金管子又曰誰能聽旌旗之所指而得執將首者賜之

千金言能得者壘千人賜之人千金其餘言能外斬首  
者賜之人十金一朝素賞四萬三千金廓然虛桓公惕  
然太息曰吾曷以識此管子對曰君勿患且使外為名  
於其內鄉為功於其親家為德於其妻子若此則士必  
爭名報德無北之意矣吾舉兵而攻破其軍并其地則  
非特四萬二千金之利也五子曰善桓公曰諾乃誠大  
將曰百人之長必為之朝禮千人之長必拜而送之降  
兩級其有親戚者必遺之酒四石肉四鴟其無親戚者

必遺其妻子酒三石肉三鼎行教半歲父教其子兄教  
其弟妻諫其夫曰見其若此其厚而不死列陳可以反  
于鄉乎桓公終舉兵攻萊戰于莒必市里鼓旗未相望  
衆少未相知而萊人大遁故遂破其軍兼其地而虜其  
將故未列地而封未出金而賞破萊軍并其地禽其君  
此素賞之計也

劉向指武篇 春秋記國家存亡以察來世雖有廣土  
衆民堅甲利兵威猛之將士卒不親附不可以戰勝助

功晉侯獲于韓楚子玉得臣敗于城濮蔡不待敵而衆潰故語曰文王不能使不附之民先軫不能戰不教之卒造父王良不能以敝車不作之馬趨疾而致遠羿逢蒙不能以枉矢弱弓射遠中微故強弱成敗之要在乎附士卒教習之而已

唐明皇幸新豐講武於驪山之下徵兵二十萬旌旗連亘五十餘里以軍容不整坐兵部尚書郭元振於纛下將斬之劉幽求張說跪於馬前諫曰元振有大功於社

稷不可殺乃流新州斬給事中知禮儀事唐紹以其制軍禮不肅故也時二大臣得罪諸軍多震懾失次惟左軍節度薛訥朔方道大總管解琬二軍不動上遣輕騎召之皆不得入其陳明皇深歎美慰勉之

代宗時河東承百井之敗騎士單弱節度使馬燧悉召牧馬廝役得數千人教之數月皆為精騎造甲必為長短三等稱其所衣以便進趨又造戰車行則載兵甲止則為營陳或塞險以遏奔衝器械無不精利居一年得

選兵三萬

文宗時西川節度使李德裕奏蜀兵羸疾老弱者從來終身不簡臣命立五尺五寸之度簡去四千四百餘人復簡募少壯者千人以慰其心所募北兵已得千五百人與土兵參居轉相訓習日益精練又蜀工所作兵器徒務華飾不堪用臣今取工於別道以治之無不堅利僖宗時西川節度使崔安潛以蜀兵怯弱奏遣大將齋牒詣陳許諸州募壯士與蜀人相雜訓練用之得三千

人分為三軍亦戴黃帽號黃頭軍又奏乞洪州弩手教蜀人用弩走丸而射之選得千人號機弩營蜀兵由是浸彊

宿衛之士累朝相承務求姑息不欲簡閱恐傷人情由是羸老者居多但騎蹇不用命實不可用每遇大敵不走即降其所以失國亦多由此後周世宗因高平之戰始知其弊謂侍臣曰凡兵務精不務多今以農夫百未能養甲士一柰何浚民之膏澤養此無用之物乎且健

懦不分衆何所勸乃命大簡諸軍精銳者升之上軍羸者斥去之又以驍勇之士多為諸藩鎮所蓄詔募天下壯士咸遣詣闕命趙匡胤選其尤者為殿前諸班其騎步諸軍各命將帥選之由是士卒精彊近代無比征伐四方所向皆捷選練之力也

宋太祖倍道襲清流關皇甫暉等陳於山下方與前鋒戰太祖引兵出山後暉等大驚走入滁州欲斷橋自守太祖躍馬麾兵涉水直抵城下暉曰人各為其主願容

成列而戰太祖笑而許之暉整衆而出太祖擁馬頸突  
陳而入大呼曰吾止取皇甫暉它人非吾敵也手劍擊  
暉中腦生擒之并擒姚鳳遂克滁州遣使獻皇甫暉等  
暉傷甚見世宗卧而言曰臣非不忠於所事但士卒勇  
怯不同耳臣鄉日屢與契丹戰未嘗見兵精如此因盛  
稱太祖之勇世宗釋之

蘇軾倡勇敢策 臣聞戰以勇為主以氣為決天子無  
皆勇之將而將軍無皆勇之士是故致勇有術致勇莫

先乎倡，倡莫善乎私。此二者，兵之微權也。英雄豪傑之士，所以陰用而不言於人，而人亦莫之識也。臣請得以備言之。夫倡者何也？氣之先也。有人人之勇怯，有三軍之勇怯，人而較之，則勇怯之相去若稜與楹。至於三軍之勇怯，則一也。出於反覆之間，而差於毫釐之際。故其權在將，與君人固有暴猛獸而不操兵，出入於白刃之中而色不變者，有見虺蜴而却走，聞鐘鼓之聲而戰慄者，是勇怯之不齊。至於如此，然閭閻之小民，爭鬪戲笑。

卒然之間而或至於殺人當其發也其心翻然其色勃  
然若不可以已者雖天下之勇夫無以過之及其退而  
思其身顧其妻子未始不惻然悔也此非必勇者也氣  
之所乘則奪其性而忘其故故古之善用兵者用其翻  
然勃然於未悔之間而其不善者沮其翻然勃然之心  
而開其自悔之意則是不戰而先自敗也故曰致勇有  
術致勇莫先乎倡均是人也皆食其食皆任其事天下  
有急而有一人焉奮而爭先而致其死則翻然者衆矣

弓矢相及劍楯相交勝負之勢未有所決而三軍之士屬目於一夫之先登則勃然者相繼矣天下之大可以名刦也三軍之衆可以氣使也諺曰一人善射百夫決拾苟有以發之及其翻然勃然之間而用其鋒是之謂倡倡莫善乎私天下之人怯者居其百勇者居其一是勇者難得也捐其妻子棄其身以蹈白刃是勇者難能也以難得之人行難能之事此必有難報之恩者矣天子必有所私之將將軍必有所私之士視其勇者而陰

厚之人之有異材者雖未有功而其心莫不自異自異而上不異之則緩急不可以望其為倡故凡緩急而肯為倡者必其上之所異也昔漢武帝欲觀兵於四夷以逞其無厭之求不愛通侯之賞以招勇士風告天下以求奮擊之人然卒無有應者於是嚴刑峻法致之死地而聽其以深入贖罪使勉彊不得已之人馳驟於死亡之地是故其將降而兵破敗而天下幾至於不測何者先無所異之人而望其為倡不已難乎私者天下之所

惡也然而為已而私之則私不可用為其賢於人而私之則非私無以濟蓋有無功而可賞有罪而可赦者凡所以媿其心而責其為倡也天下之禍莫大于上作而下不應上作而下不應則上亦將窮而自止方西戎之叛也天子非不欲赫然誅之而將帥之臣謹守封略外視內顧莫有一人先奮而致命而士卒亦循循焉莫肯盡力不得已而出爭先而歸故西戎得以肆其猖狂而吾無以應則其勢不得不重賂而求和其患起於天子

無同憂患之臣而將軍無腹心之士西師之休十有餘年矣用法益密而進人益難賢者不見異勇者不見私天下務為奉法循令要以如式而止臣不知其緩急將誰為之倡哉

教戰守策 夫當今生民之患果安在哉在於知安而不知危能逸而不能勞此其患不見於今而將見於他日今不為之計其後將有所不可救者昔者先王知兵之不可去也是故天下雖平不敢忘戰秋冬之隙致民

田獵以講武教之以進退坐作之方使其耳目習於鐘鼓旌旗之間而不亂使其心志安於斬刈殺伐之際而不攝是以雖有盜賊之變而民不至於驚潰及至後世用迂儒之議以去兵為王者之盛節天下既定則卷甲而藏之數十年之後甲兵損弊而民日以安於佚樂卒有盜賊之警則相與恐懼訛言不戰而走開元天寶之際天下豈不大治惟其民安於太平之樂豢於遊戲酒食之間其剛心勇氣消耗鈍眊痿屢而不復振是以區

區之祿山一出而乘之四方之民獸奔鳥竄乞為囚虜之不暇天下分裂而唐室因以微矣蓋嘗試論之天下之勢譬如一身王公貴人所以養其身者豈不至哉而其平居常苦於多疾至於農夫小民終歲勤苦而未嘗告病此其故何也夫風雨霜露寒暑之變此疾之所由生也農夫小民盛夏力作而窮冬暴露其筋骸之所衝犯肌膚之所浸漬輕霜露而狎風雨是故寒暑不能為之毒今王公貴人處於重屋之下出則乘輿風則襲裘

雨則御蓋凡所以慮患之具莫不備至畏之太甚而養之太過小不如意則寒暑入之矣是故善養身者使之能逸而能勞步趨動作使其四體狃於寒暑之變然後可以剛健彊力涉險而不傷夫民亦然今者治平之日久天下之人驕惰脆弱如婦人孺子不出於閨門論戰鬪之事則縮頸而股栗聞盜賊之名則掩耳而不願聽而士大夫亦未嘗言兵以為生事擾民漸不可長此不亦畏之太甚而養之太過歟且夫天下固有意外之患

也愚者見四方之無事則以為變故無自而有此亦不然矣  
今國家所以奉西北之敵者歲以百萬計奉之者有限而求  
之者無厭此其勢必至於戰戰者必然之勢也不先於我則先  
於彼不出於西則出於北所不可知者有遲速遠近而要以不能  
免也天下苟不免於用兵而用之不以漸使民於安樂無事之中  
一旦出身而臨死地則其為患必有所不測故曰天下之民知安而  
不知危能逸而不能勞此臣所謂大患也臣欲使士大夫尊  
尚武勇講習兵法庶人之在官者教以行陣之節役民之

司盜者授以擊刺之術每歲終則聚於郡府如古都試之法有勝負有賞伐而行之既久則又以軍法從事然者必以為無故而動民又撓以軍法則民將不安而臣以為此所以安民也天下果未能去兵則其一旦將以不教之民而驅之戰夫無故而動民雖有小怨然孰與夫一旦之危哉今天下屯聚之兵驕豪而多怨陵壓百姓而邀其上者何故此其心以為天下之知戰者惟我而已如使平民皆習於兵彼知有所敵則固以破其姦謀而折其驕氣利害之際豈不亦甚明歟

邯士卒二則

吳起為魏將而攻中山軍人有病疽者吳起跪而自吮其膿傷者之母立泣人問曰將軍於若子如是尚何為而泣對曰吳起吮其父之瘡而父死今是子又將死也今吾是以泣

邯鄲傳舍吏子李同說平原君曰君不憂趙亡邪平原君曰趙亡則勝為敵何為不憂乎李同曰邯鄲之民炊骨易子而食可謂急矣而君之後宮以百數婢妾被綺

穀餘梁肉而民褐衣不完糟糠不厭民困兵盡或剗木為矛矢而君器物鍾磬自若使秦破趙君安得有此使趙得全君何患無有今君誠能令夫人以下編於士卒之間分功而作家之所有盡散以饗士士方其危苦之時易德耳於是平原君從之得敢死之士三千人李同遂與三千人赴秦軍秦軍為之却三十里亦會楚魏救至秦兵遂罷邯鄲復存李同戰死封其父為侯

歸附 六則 得人心一則併

項梁乃以八千人渡江而西聞陳嬰已下東陽使使與連和俱西陳嬰者故東陽令史居縣中素信謹稱為長者東陽少年殺其令相聚數千人欲置長無適用乃請陳嬰嬰謝不能遂彊立嬰為長縣中從者得二萬人少年欲立嬰便為王異軍蒼頭特起陳嬰母謂嬰曰自我為汝家婦未嘗聞汝先古之有貴者今暴得大名不祥不如有所屬事成猶得封侯事敗易以亡非世所指名

也嬰乃不敢為王謂其軍吏曰項氏世世將家有名於楚今欲舉大事將非其人不可我倚名族亡秦必矣於是衆從其言以兵屬項梁

漢竇融聞光武即位而心欲東向以河西隔遠未能自通時隗囂先稱建武年號融等從受正朔囂皆假其將軍印綬囂外順人望內懷異心使辯士張玄游說河西曰更始事業已成尋復亡滅此一姓不再興之效今即有所主便相係屬一旦拘制自令失柄後有危殆雖悔

無及今豪傑競逐雌雄未決當各據其土宇與隴蜀合從高可為六國下不失尉佗融等於是召豪傑及諸太守計議其中智者皆曰漢承堯運厯數延長今皇帝姓號見于圖書自前世博物道術之士谷子雲夏賀良等建明漢有再受命之符言之久矣故劉子駿改易名字冀應其占及莽末道士西門君惠言劉秀當為天子遂謀立子駿事覺被殺出謂百姓觀者曰劉秀真汝主也皆近事暴著智者所共見也除言天命且以人事論之

今稱帝者數人而洛陽土地最廣甲兵最強號令最明  
觀符命而察人事它姓殆未能當也諸郡太守各有賓  
客或同或異融小心精詳遂決策東向五年夏遣長史  
劉鈞奉書獻馬先是帝聞河西完富地接隴蜀常欲招  
之以逼囂述亦發使遺融書遇鈞於道即與俱還帝見  
鈞歡甚禮饗畢乃遣令還賜融璽書因授融為涼州牧  
璽書既至河西咸驚以為天子明見萬里之外網羅張  
立之請融即復遣鈞上書曰臣融竊伏自惟幸得託先

后未屬蒙恩為外戚累世二千石至臣之身復備列位  
假歷將帥守持一隅以委質則易為詞以納忠則易為  
力書不足以深達至誠故遣劉鈞口陳肝膽自以底裏  
上露長無纖介而璽書盛稱蜀漢二主三分鼎足之權  
任器尉佗之謀竊自痛傷臣融雖無識猶知利害之際  
順逆之分豈可背真舊之主事姦偽之人廢忠貞之節  
為傾覆之事棄已成之基求無冀之利此三者雖問狂  
夫猶知去就而臣獨何以用心謹遣同產弟友詣闕口

陳區區友至高平會囂反叛道絕馳還遣司馬席封間行通書帝復遣席封賜融友書所以慰藉之甚備融既深知帝意乃與隗囂書責讓之囂不納融乃與五郡太守共砥厲兵馬上疏請師期帝深嘉美之乃賜融以外屬國及太史公五宗外戚世家魏其侯列傳詔報曰每追念外屬孝景皇帝出自竇氏定王景帝之子朕之所祖昔魏其一言繼綱以正長君少君尊奉師傅修成淑德施及子孫此皇太后神靈上天祐漢也從天水來者

寫將軍所讓隗囂書痛入骨髓畔臣見之當股慄慙愧忠臣則酸鼻流涕義士則曠若發矇非忠孝慤誠孰能如此豈其德薄者所能克堪囂自知失河西之助族禍將及欲設間離之說亂惑真心轉相解構以成其姦又京師百僚不曉國家及將軍本意多能採取虛偽誇誕妄談令忠孝失望傳言乖實毀譽之來皆不徒然不可不思今關東盜賊已定大兵今當悉西將軍其抗厲威武以應期會融被詔即與諸郡守將兵入金城

漢兵與新市平林衆俱敗于小長安各欲解去伯升聞下江軍在宜秋即與光武及李通造王常壁曰願見下江一賢將議大事成丹張卬共推遣常伯升見常說以合從之利常大悟曰王莽篡弑殘虐天下百姓思漢故豪傑並起今劉氏復興即真主也誠思出身為用輔成大功伯升曰如事成豈敢獨享之哉遂與常深相結而去常還具為丹印言之丹印負其衆皆曰大丈夫既起當各自為主何故受人制乎常心獨歸漢乃稍曉說其

將帥曰往者成哀哀微無嗣故王莽得乘間篡位既有  
天下而政令苛酷積失百姓之心民之謳吟思漢非一  
日也故使吾屬因此得起夫民所怨者天所去也民所  
思者天所與也舉大事必當下順民心上合天意功乃  
可成若負強恃勇觸情恣欲雖得天下必復失之以秦  
項之勢尚至夷覆況今布衣相聚草澤以此行之滅亡  
之道也今南陽諸劉舉宗起兵觀其來議事者皆有深  
計大慮王公之才與之并合必成大功此所以祐吾屬

也下江諸將雖倔強少識然素敬常乃皆謝曰無王將軍吾屬幾陷於不義願敬受教即引兵與漢軍及新市平林合

晉冀州太守邵續徒衆寡弱謀降石勒劉曜言于續曰夫田單包胥齊楚之小吏耳猶能存已滅之邦全喪敗之國今將軍仗精銳之衆居全勝之城如何墜將登之功於一簣委忠信之人於豺狼乎且項羽袁紹非不強也高祖縞冠人應如響曹公奉帝而諸侯綏穆何者蓋

逆順之理殊自然之數定也況夷戎醜類屯結無賴雖有犬羊之盛終有庖宰之患而欲托相結援無乃殆哉續曰若如君言計將安出屑曰琅邪王以聖德欽明創基江左中興之隆可企踵而待今為將軍計者莫若抗大順以激義士之心奉忠正以厲軍人之志夫機事在密時至難違存亡興廢在此舉矣續從之乃殺異議者數遣使江南朝廷嘉之

宋李世輔綏德清澗人自唐以來世襲蘇尾九族都巡

檢使世輔年十七隨父永竒出入行陣金人犯鄜延經略王庶募間者世輔往應募有敵人夜宿陶穴世輔縋陶穴中得十七人皆殺之取首二級馬二匹餘馬悉折其足庶大竒之補充隊將由是知名遷副將金人陷延安授永竒父子官永竒聚泣曰我宋臣也世襲國恩乃為彼用邪會劉豫令世輔帥馬軍赴東京永竒密戒之曰汝若得乘機即歸本朝無以我故貳其志事成我亦不朽矣世輔至東京劉麟喜之授南路鉞轄乃密遣其

客雷燦以蠟書赴行在及豫廢烏珠以萬騎馳獵淮上  
與世輔獨立馬圍場間世輔戒吳俊往探淮水可渡馬  
處欲執烏珠歸朝俊還世輔馳問之為竹刺傷馬而止  
烏珠授世輔知同州世輔至鄜省父永竒教世輔曰同  
州入南山乃金人往來驛路汝可於此擒其酋渡洛渭  
由商虢歸朝第報我知我當以兵取延安而歸世輔赴  
同州即遣黃士成等持書由蜀至吳報歸朝事金薩里  
罕來同州世輔以計執之馳出城至洛河舟船後期不

得渡與追騎屢戰皆捷世輔憇高原望追騎益多薩里罕搏頰求哀世輔乃與折箭為誓不得殺同州人及害我骨肉薩里罕許之遂推之下山崖追兵爭救得免世輔携老幼長驅而北進鄜城縣急遣人告永竒永竒即挈家出城至馬趙谷為金人所及家屬三百口皆遇害世輔僅以二十六人奔夏世輔至夏夏人問其故世輔泣具言父母妻子之亡切齒疾首恨不即死願得二十萬人生擒薩里罕取陝西五路歸於夏世輔亦得報

不共戴天之讐夏主曰爾能立功則不斬借兵時有酋  
豪號青面夜叉者久為夏國患乃令世輔圖之世輔以  
三千騎晝夜疾馳奄至其帳擒之乃還夏主大悅即出  
二十萬騎以文臣王樞武臣葉額為陝西招撫使世輔  
為延安招撫使世輔至延安總管趙惟清大呼曰鄜延  
今復歸朝已有赦書世輔取赦文觀之因與官屬列拜  
大哭乃以舊部八百餘騎往見王樞葉額諭之曰世輔  
已得延安府見講和赦書招撫可以本部軍歸國葉額

不從曰初經略乞兵來取陝西今既到此乃令我歸邪  
世輔知勢不可乃出刀斫葉額不及擒王樞縛之夏人  
以鐵鷄子軍來世輔以所部拒之馳揮雙刀所向披靡  
夏兵大潰殺死蹤躡無慮萬人獲馬四萬匹世輔揭榜  
招兵每得一人予馬一匹旬日間得驍勇少壯者萬人  
乃擒害其父母弟姪者斬于東市行至鄜州有馬步軍  
四萬餘吳玠遣張振撫諭之曰兩國見議和好不可生  
事世輔遂見玠于河池玠遣詣樓炤于長安炤承詔以

為護國軍承宣使樞密行府前軍都統制送之朝世輔  
乃率部下三千南來高宗撫勞再三賜名顯忠

晉祖逖鎮雍州數遣軍要截石勒勒屯戍漸蹙候騎常  
獲濮陽人逖厚待遣歸咸感逖恩德率鄉里五百家降  
逖勒又遣精騎萬人距逖復為逖所破勒鎮戍歸附者  
甚多時趙固上官已李矩郭默等各以詐力相攻擊逖  
馳使和解之示以禍福遂受逖節度逖愛人下士雖疎  
交賤隸皆恩禮之黃河以南盡為晉土河上堡固先有

任子在胡者皆聽兩屬時遣游軍偽抄之明其未附諸  
塢主感戴胡中有異謀輒密以聞前後尅獲亦由此也  
其有微功賞不踰日躬自儉約勸督農桑克己務施不  
畜資產子弟耕耘負擔樵薪又收葬枯骨為之祭酸百  
姓感悅嘗置酒大會耆老中坐流涕曰吾等老矣更得  
父母死將何恨乃歌曰幸哉遺黎免俘虜三辰既朗遇  
慈父玄酒忘勞甘瓠脯何以詠恩歌且舞其得人心如  
此

得人心一則併

約降十七則

陳餘說陳王曰大王舉梁楚而西務在入關未及收河北也臣嘗遊趙知其豪傑及地形願請奇兵北略趙地於是陳王以故所善陳人武臣為將軍邵騷為護軍以張耳陳餘為左右校尉予卒三千人北略趙地武臣等從白馬渡河至諸縣說其豪傑曰秦為亂政虐刑以殘賊天下數十年矣北有長城之役南有五嶺之戍外內騷動百姓罷敝頭會箕歛以供軍費財匱力盡民不聊

生重之以苛法峻刑使天下父子不相安陳王奮臂為  
天下倡始王楚之地方二千里莫不響應家自為怒人  
自為鬪各報其怨而攻其讎縣殺其令丞郡殺其守尉  
今已張大楚王陳使吳廣周文將卒百萬西擊秦於此  
時而不成封侯之業者非人豪也諸君試相與計之夫  
天下同心而苦秦久矣因天下之力而攻無道之君報  
父兄之怨而成割地有土之業此士之一時也豪傑皆  
然其言乃行收兵得數萬人號武臣為武信君下趙十

城餘皆城守莫肯下乃引兵東北擊范陽范陽人蒯通說范陽令曰竊聞公之將死故吊雖然賀公得通而生范陽令曰何以吊之對曰秦法重足下為范陽令十年矣殺人之父孤人之子斷人之足黥人之首不可勝數然而慈父孝子莫敢傳办公之腹中者畏秦法耳今天下大亂秦法不施然則慈父孝子且傳办公之腹中以成其名此臣之所以吊公也今諸侯畔秦矣武信君兵且至而君堅守范陽少年皆爭殺君下武信君君急遣

臣見武信君可轉禍為福在今矣范陽令乃使蒯通見  
武信君曰足下必將戰勝然後略地攻得然後下城臣  
竊以為過矣誠聽臣之計可不攻而降城不戰而略地  
傳檄而千里定可乎武信君曰何謂也蒯通曰今范陽  
令宜整頓其士卒以守戰者也怯而畏死貪而重富貴  
故欲先天下降畏君以為秦所置吏誅殺如前十城也  
然今范陽少年亦方殺其令自以城距君君何不齎臣  
侯印拜范陽令范陽令則以城下君少年亦不敢殺其

令令范陽令乘朱輪華轂使驅馳燕趙郊燕趙郊見之皆曰此范陽令先下者也即喜矣燕趙城可毋戰而降也此臣之所謂傳檄而千里定者也武信君從其計因使蒯通賜范陽令侯印趙地聞之不戰以城下者三十餘城

韓王信復與胡騎入居參合距漢漢使柴將軍擊之遺信書曰陛下寬仁諸侯雖有畔亡而復歸輒復故位號不誅也大王所知今王以敗亡走胡非有大罪急自歸

韓王信報曰陛下擢僕起閭巷南面稱孤此僕之幸也  
滎陽之事僕不能死囚于項籍此一罪也及寇攻馬邑  
僕不能堅守以城降之此二罪也今反為寇將兵與將  
軍爭一旦之命此三罪也夫種蠡無一罪身死亡今僕  
有三罪於陛下而欲求活於世此伍子胥所以償於吳  
也今僕亡匿山谷間旦暮乞貸蠻夷僕之思歸如痿人  
不忘起盲者不忘視也勢不可耳遂戰柴將軍屠參合

斬韓王信

隗囂將高峻據高平耿弇等攻之一年不拔光武入關  
將自征之寇恂時從駕諫曰長安道里居中應接近便  
安定隴西必懷震懼此從容一處可以制四方也今士  
馬疲倦方履險阻非萬乘之固前年潁川可為至戒帝  
不從進軍及汎峻猶不下帝議遣使降之乃謂恂曰卿  
前止吾此舉今為吾行也若峻不即降引耿弇等五營  
擊之恂奉璽書至峻遣軍師皇甫文出謁辭禮不屈恂  
怒將誅文諸將諫曰高峻精兵萬人率多強弩西遮隴

道連年不下今欲降之而反戮其使無乃不可乎恂不應遂斬之遣其副歸告峻曰軍師無禮已戮之矣欲降即降不欲固守峻惶恐即日開城門降諸將皆賀因曰敢問殺其使而降其城何也恂曰皇甫文峻之腹心其所取計者也今來辭意不屈必無降心全之則文得其所計殺之則峻亡其膽是以降耳諸將皆曰非所及也

順帝時廣陵賊張嬰等衆數萬人殺刺史二千石寇亂楊徐間積十餘年朝廷不能討梁冀乃諷尚書以張綱

為廣陵太守因欲以事中之前遣郡守率多求兵馬綱  
獨請單車之職既到乃將吏卒十餘人徑造嬰壘以慰  
安之求得與長老相見申示國恩嬰初大驚既見綱誠  
信乃出拜謁綱延置上坐問所疾苦乃譬之曰前後二  
千石多肆貪暴故致公等懷憤相聚二千石信有罪矣  
然為之者又非義也今主上仁聖欲以文德服叛故遣  
太守思以爵祿相榮不願以刑罰相加今誠轉禍為福  
之時也若聞義不服天子赫然震怒荆揚充豫大兵雲

合豈不危乎若不料強弱非明也棄善取惡非智也去順效逆非忠也身絕血嗣非孝也背正從邪非直也見義不為非勇也六者成敗之幾利害所從公其深計之嬰聞泣下曰荒裔愚人不能自通朝廷不堪侵枉遂復相聚偷生若魚遊釜中喘息須臾間耳今聞明府之言乃嬰等更生之晨也既陷不義實恐投兵之日不免孥戮綱約之以天地誓之以日月嬰深感悟乃辭還營明日將所部萬餘人與妻子面縛歸降綱乃單車入嬰壘

大會置酒為樂散遣部衆任從所之親為卜居宅相田  
疇子弟欲為吏者多引召之人情悅服南州晏然朝廷  
論功當封梁冀遏絕乃止天子嘉美徵欲擢用綱而嬰  
等上書乞留乃許之綱在郡一年年三十六卒百姓老  
幼相携詣府赴哀者不可勝數綱自被疾吏人咸為祠  
祀祈福皆言千秋萬歲何時復見此君張嬰等五百餘  
人制服用喪送到犍為負土成墳

晉石勒新死季龍專恣石聰及譙郡太守彭彪等各遣

使請降孔坦與聰書曰華夷道乖南北迥邈瞻河企宋  
每懷饑渴數會陽九天禍晉國姦凶猾夏乘釁肆虐我  
德雖衰天命未改乾符啓再集之慶中興應靈期之會  
百六之艱既過惟新之美日隆而神州振蕩遺恨波散  
誓命戎狄之手跼蹐豺狼之穴朝廷每臨寐永歎痛心  
疾首天罰既集罪人斯墮王旅未加自相魚肉豈非人  
怨神怒天降其災蘭艾同焚賢愚所歎矜哀勿喜我后  
之仁大赦曠廓唯季龍是討彭譙使至粗具動靜知將

軍忿疾醜類翻然同舉承問欣豫慶若在已何知幾之  
先覺介石之易悟哉引領來儀怪無聲息將軍出自名  
族誕育洪胄遭世多故國傾家覆生離親屬假養異類  
雖逼偽寵將亦何賴聞之者猶或有悼況身嬰之能不  
憤慨哉非我族類其心必異誠反族歸正之秋圖義建  
功之日也若將軍喻納徃言宣之同盟率關右之衆輔  
河南之卒申威趙魏為國前驅雖竇融之保西河黜布  
之法項羽比諸古今未足為喻聖上寬明宰輔弘納雖

射鉤之隙賞之故行雍齒之恨侯之列國況二三子無  
曩人之嫌而遇天啓之會當如影響有何遲疑今六軍  
誠嚴水陸齊舉熊羆踴躍訖噬爭先鋒鎬一交玉石同  
碎雖復後悔何嗟及矣僕以不才世荷國寵雖實不敏  
誠為行李之主區區之情還信所具夫機事不先鮮不  
後悔自求多福唯將軍圖之朝廷遂不果北伐人皆懷  
恨

謝玄以殷仲堪為長史甚厚遇之仲堪致書於玄曰胡

亡之後中原子女鬻于江東者不可勝數骨肉星離荼  
毒終年怨毒之氣感傷和理誠喪亂之常足以懲戒復  
非王澤廣潤愛育蒼生之意也當今大人既慨然經略  
將以救其塗炭而使理至於此良可嘆息願節下弘之  
以道德運之以神明隱心以及物垂理以禁暴使足踐  
晉境者必無懷惑之心枯槁之類莫不同漸天潤仁義  
與干戈並運德心與功業俱隆實所期于明德也頃聞  
抄掠所得多皆採梠饑人壯者欲以殺子少者志在存

親行者傾筐以顧念居者吁嗟以待延而一旦幽繁生  
離死絕求之於情可傷之甚昔孟孫獵而得麑使秦西  
以歸之其母隨而悲鳴不忍而放之孟孫赦其罪以傳  
其子禽獸猶不可離況於人乎夫飛鶴惡鳥也食桑葚  
猶懷好音雖曰戎狄其無情乎苟感之有物非難化也  
必使邊界無貪小利強弱不得相凌德音一發必聲振  
沙漠二寇之黨將靡然向風何憂黃河之不濟函谷之  
不開哉玄深然之

元顯以討桓玄事誥劉牢之牢之以玄少有雄名杖全  
楚之衆懼不能制又慮平玄之後功蓋天下必不為元  
顯所容深懷疑貳不得已率北府文武屯列洲桓玄遣  
何穆說牢之曰自古亂世君臣相信者有燕昭樂毅玄  
德孔明然皆勲業未卒而二主早世設使功成事遂未  
保二臣之禍也鄙語有之高鳥盡良弓藏狡兔殫獵犬  
烹故文種誅于勾踐韓白戮于秦漢彼皆英雄伯王之  
主猶不敢信其功臣況凶愚凡庸之流乎自開闢以來

戴震主之威挾不賞之功以見容於閭主者而誰至於管仲相齊雍齒侯漢往往有之況君見與無射鉤屢逼之讐邪今君戰敗則傾宗戰勝亦覆族欲以安歸乎孰若翻然改圖保其富貴則身與金石等固名與天壤無窮孰與頭足異處身名俱滅為天下笑哉唯君圖之牢之自謂握強兵才能美略足以經綸江表時譙王尚之已敗人情轉沮乃頗納穆說遣使與亥交通

北齊司馬消難以齊王昏虐滋甚陰為自全之計曲意

撫循所部上黨王渙之亡也鄴中大擾疑其赴成臯御  
史中丞畢義雲遣御史詣北豫州先禁消難典叢家客  
等消難懼密請降于周周主遣柱國達奚武大將軍楊  
忠帥騎士迎消難三遣使消難皆不報武疑有變欲還  
忠曰有進死無退生獨以千騎夜趣城下四面峭絕但  
聞擊柝聲武麾騎西去忠勒餘騎不動俟開門而入馳  
南皆改鞍而卧齊衆來追至洛北忠謂將士曰今在死

地賊必不敢渡水已而果然乃徐引還武嘆曰達奚武自謂天下健兒今日服矣

梁武帝時東魏以侯景為河南大行臺上谷公景又遣其行臺郎中丁和來上表言臣與高澄有隙請舉函谷以東瑕丘以西豫廣潁荆襄充南充濟東豫洛陽北荆北楊等十三州內附惟青徐數州僅須折簡且黃河以南皆臣所職易同反掌若齊宋一平徐事燕趙武帝召羣臣廷議尚書僕射謝舉等皆曰頃歲與魏通和邊境

無事今納其叛臣竊謂非宜武帝曰雖然得景則塞北  
可清機會難得豈宜膠柱然意猶未決嘗獨言我國家  
如金甌無一傷缺今忽受景地詎是事宜脫致紛紜悔  
之何及朱异揣知武帝意對曰聖明御宇南北歸仰正  
以事無機會未達其心今侯景分魏土之半以來自非  
天誘其衷人贊其謀何以至此若拒而不內恐絕後來  
之望此誠易見願陛下無疑武帝乃定議納景以景為  
大將軍封河南王周弘正善占候前此謂人曰國家數

年後當有兵起及聞納景曰亂階在此矣 慕容紹宗以鐵騎五千夾擊侯景景士卒不樂南渡其將暴顯等各帥所部降於紹宗景衆大潰與腹心數騎自破石濟淮朝廷聞景敗未得審問或云景與將士盡沒上下咸以為憂太子詹事何敬容曰得景遂死深為朝廷之福太子失色問其故敬容曰景翻覆叛臣終當亂國景遭儀同三司于子悅馳以敗聞武帝即以景為南豫州牧光祿大夫蕭介上表諫曰竊聞侯景以渦陽敗績隻馬

歸命陛下不悔前禍復敕容納臣聞凶人之性不移天下之惡一也昔呂布殺丁原以事董卓終誅董而為賊劉牢反王恭以歸晉還背晉以構妖何者狼子野心終無馴狎之性養虎之喻必見飢噬之禍侯景以凶狡之才荷高歡卵翼之遇位忝台司任居方伯然而高歡墳土未乾即還反噬逆力不逮乃復逃死關西宇文不容故復投身於我陛下前者所以不逆細流正欲北屬國降胡以討匈奴冀獲一戰之效耳今既亡師失地直是

境上之匹夫陛下愛匹夫而棄與國臣竊不取也若國家猶待其更鳴之晨歲暮之效臣竊惟侯景必非歲暮之臣棄鄉國如脫屣背君親如遺介豈知遠慕聖德為江淮之純臣乎事迹顯然無可致惑臣朽老疾侵不應干預朝政但楚囊將死有城郢之忠衛魚臨亡亦有尸諫之節臣忝為宗室遺老敢忘劉向之心武帝歎息其忠然不能用

東魏大將軍高澄數遣書移復求通好貞陽侯淵明乃

遣省事夏侯僧辯奉啓於武帝。武帝得啓與朝臣議之。  
右衛將軍朱异御史中丞張綰等皆曰：靜寇息民，和實  
為便。司農卿傅岐獨曰：高澄何事須和？必是設間故命。  
貞陽遣使欲令侯景自疑，景意不安，必圖禍亂。若許通  
好，正墮其計。中、异等固執宜和，武帝亦厭用兵，乃從异  
言。僧辯還過壽陽，侯景竊訪知之，攝問具服。乃陳啓於  
武帝曰：高氏心懷鴻毒，怨盈北土，人願天從，歡身殲越。  
子澄嗣惡計滅，待時所以昧此一勝者，蓋天蕩澄心以

盈凶毒耳澄苟行合天心腹心無疾又何急急奉璧求和豈不以秦兵扼其喉胡騎迫其背故甘辭厚幣取安大國臣聞一日縱敵數世之患何惜高澄一豎以棄億兆之心使其假命強梁以遺後世非直愚臣扼腕實亦志士痛心昔伍相奔吳楚邦卒滅陳平去項劉氏用興臣雖才劣古人心同往事武帝遣使弔澄景又啓曰臣與高氏釁隙已深仰憑威靈期雪讐恥今陛下復與高氏連和使臣何地自處乞申後戰宣揚皇威武帝報之

曰朕與公大義已定豈有成而相納敗而相棄乎今高  
氏有使求和朕亦更思偃武公但清淨自居無勞慮也  
景又啓曰臣今蓄糧聚衆秣馬潛戈指日計期克清趙  
魏不容軍出無名故願以陛下為主耳今陛下棄臣遐  
外南北復通將恐微臣之身不免高氏之手武帝又報  
曰朕為萬乘之主豈可失信于一物想公深得此心不  
勞復有啓也景乃詐為鄴中書求以貞陽侯易景武帝  
將許之舍人傅岐曰侯景以窮歸義棄之不祥且百戰

之餘寧肯束手受繫謝舉朱异曰景奔敗之將一使之力耳武帝從之復書曰貞陽旦至侯景夕返景謂左右曰我固知吳老公薄心腸王偉說景曰今坐聽亦死舉大事亦死唯王圖之於是始為反計屬城居民悉召募為軍士輒停責市估及田租百姓子女悉以配將士是後景表疏稍稍悖慢又聞徐陵等使魏反謀益甚臨賀王正德所至貪暴不法屢得罪於武帝由是憤恨陰養死士儲米積貨幸國家有變景知之致牋於正德曰今

天子年尊姦臣亂國以景觀之計日禍敗大王屬當儲  
貳中被廢黜四海業業歸心大王景雖不敏實思自效  
願王允副蒼生正德大喜報之曰朝廷之事如公所言  
僕之有心為日久矣今僕為其內公為其外何有不濟  
機事在速今其時矣鄱陽王範密啓景謀反時武帝以  
邊事專委朱异動靜皆關之异以為必無此理武帝報  
範曰景孤危寄命譬如嬰兒仰人乳哺以此事勢安能  
反乎範復請自以合肥之衆討之武帝不許景反於壽

陽以誅朱异徐麟陸驗周石珍為名异等皆以姦佞驕  
貪蔽主弄權為時人所疾故景託以興兵景西攻馬頭  
遣其將宋子仙東攻木柵執戍主曹璆等武帝聞之笑  
曰是何能為吾折筆笞之敕購斬景者封三千戶公

唐太宗進軍白巖城遂破高麗白巖城請降既而中悔  
上怒其反覆攻之令軍中曰得城當悉以人物賞戰士  
六月復請降上將受之李世勣謂曰士卒所以爭冒矢  
石不顧其死者貪擄獲耳今城垂拔奈何更受其降孤

戰士之心上下馬謝曰將軍言是也然縱兵殺人而據其妻孥朕所不忍將軍麾下有功者朕以庫物賞之庶因將軍贖此一城世勳乃退上受其降以為巖州

薛延陀多彌可汗猜偏好殺廢棄父時貴臣專用已所親昵國人不附回紇諸部擊之大敗太宗詔江夏王道宗等將兵擊之國中驚擾多彌出走回紇殺之盡據其地餘衆西走猶七萬餘口共立真珠兄子咄摩支遣使奉表請居鬱督軍山之北詔遣使安集之勅勒九姓酋

長聞其來皆懼朝議亦恐其為磧北之患乃遣李世勣  
圖之上自詣靈州招撫太子當從行少詹事張行成以  
為不若使之監國接對百寮明習庶政上然之李世勣  
至麟督軍山咄摩支降道宗兵既渡磧薛延陁拒戰道  
宗擊破之遣使招諭勃勒諸部其酋長皆喜請入朝駕  
至浮陽回紇等十一姓各遣使歸命乞置官司上大喜  
遣使納之詔曰朕聊命偏師遂擒頡利始弘廟略已滅  
延陀勑勒百餘萬戶請為州郡混元以降殊未前聞宣

備禮告廟仍頒示普天為詩曰雪恥酬百王除兇報  
千古勒石于靈州

王國良本湖南牙將觀察使辛京果以其家富使戍武  
岡而以死罪加之國良懼據縣聚衆侵掠州縣討之不  
克及曹王臯為觀察使遺國良書曰我與將軍俱為京  
果所搆我以為聖朝湔洗何必復加兵刃于將軍乎將  
軍遇我不降後悔無及國良疑未決臯乃從一騎越五  
百里抵國良壁大呼曰我曹王也來受降國良大驚趨

出迎拜畢執其手約為兄弟盡焚攻守之具散其衆使還農詔赦之

田悅說王武俊共擊李抱真復遣賈林說武俊曰臨洺兵精而有備未易輕也今戰勝得地則利歸魏博不勝則恒冀大傷且易定滄趙皆大夫之故地也不如先取之武俊乃辭悅北歸先是武俊召回紇兵至是回紇違干將三千人至幽州滔因說之欲與俱取東都賈林復說武俊曰自古國家有患未必不因之更興況主上聰

明英武天下誰肯捨之共事朱泚乎滔自為盟主以來  
輕蔑同列今又西倚其兄北引回紇其志欲盡吞河朔  
而王之大夫雖欲為之臣不可得矣且大夫本以忠義  
平誅亂臣當時宰相處置失宜為滔所誑誘故蹉跌至  
此若與昭義併力取滔其勢必獲滔亡則泚自破此不  
世之功轉禍為福之道也今諸侯輻輳攻泚不日當平  
天下已定大夫乃悔而歸國則已晚矣武俊攘袂作色  
曰二百年天子吾不能臣豈能臣此田舍兒乎密與抱

真及馬燧相結約為兄弟

憲宗時李德裕追論維州悉怛謀事云維州據高山絕  
頂三面臨江在戎虜平川之衝是漢地入兵之路初河  
隴盡沒唯此獨存吐蕃潛以婦人嫁此州門者二十年  
後兩男長成竊開壘門引兵夜入遂為所陷號曰無憂  
城從此得併力於四邊更無虞於南路憑陵近甸旰食  
累朝貞元中韋皋欲經略河湟須此城為始萬旅盡銳  
急攻數年雖擒論莽熟而還城堅卒不可克臣初到西

蜀外揚國威中緝邊備其維州熟臣信令空壁來歸臣始受其降南蠻震懾山西八國皆願內屬其吐蕃合水樓雞等城既失險阨自須抽歸可減八處鎮兵坐收千餘里舊地且維州未降前一年吐蕃猶圍魯州豈顧盟約臣受降之初指天為誓面許奏聞各加酬賞當時不與臣者望風疾臣詔臣執送悉怛謀等令彼自戮臣寧忍以三百餘人命棄信偷安累表陳論乞垂矜捨答詔嚴切竟令執還體備三木輿於竹畚及將就路冤叫鳴

嗚將吏對臣無不噴涕其部送者更為蕃帥譏謂云既已降彼何須送來復以此降人戮於漢境之上恣行殘忍用固攜離至乃擲其嬰孩承以槍槊絕忠款之路快兇虐之情從古已來未有此事雖時更一紀而運屬千年乞追獎忠魂各加褒贈詔贈悉怛謀右衛將軍司馬光曰論者多疑維州之取捨不能決牛李之是非臣以為昔荀吳圍鼓鼓人或請以城叛吳弗許曰或以吾城叛吾所甚惡也人以城來吾獨何好焉吾不可以欲

城而邇姦使鼓人殺叛者而繕守備是時唐新與吐蕃修好而納其維州以利言之則維州小而信大以害言之則維州緩而關中急然則為唐計者宜何先乎悉怛謀在唐則為向化在吐蕃不免為叛臣其受誅也又何矜焉且德裕所言者利也僧孺所言者義也匹夫徇利而忘義猶恥之況天子乎譬如鄰人有牛逸而入於家或勸其兄歸之或勸其弟攘之勸歸者曰攘之不義也且致訟勸攘者曰彼嘗攘吾羊矣何義之拘牛大畜也

鬻之可以富家以是觀之牛李之是非端可見矣

僖宗時羣盜阡能黨愈熾侵淫入蜀州境陳敬瑄以楊行遷等久無功以押牙高仁厚為都招討指揮使將兵五百人往代之未發前一日有鬻麪者自旦至午出入營中數四邇者疑之執而訊之果阡能之謀也仁厚命釋縛溫言問之對曰某村民阡能因其父母妻子於獄云汝訶事歸得實則免汝家不然盡死某非願爾也仁厚曰誠知汝如是我何忍殺汝今縱汝歸然我活汝一

家汝能為我潛語寨中人云僕射愍汝曹皆良人為賊  
所制尚書來汝曹各投兵迎降尚書當使人書汝背為  
歸順字遣汝復舊業所欲誅者阡能羅渾擎句胡僧羅  
夫子韓求五人耳必不使橫及百姓也遂遣之明日仁  
厚引兵發至雙流阡能聞仁厚將至遣羅渾擎立五寨  
於雙流之西仁厚遣人釋戎服入賊中告諭如昨日所  
以語謀者賊大喜呼譟爭棄甲投兵請降拜如摧山仁  
厚悉撫諭書其背使歸語寨中未降者寨中餘衆爭出

降渾擊狼狽踰慙走其衆執以詣仁厚明旦仁厚謂降者曰始欲即遣汝歸而前塗諸寨百姓未知吾心或有憂疑藉汝曹為我前行過穿口新津寨下示以背字告諭之比至延貢可歸矣乃取渾擊旗倒繫之每五十人為隊授以一旗使前走揚旗疾呼曰羅渾擊已生擒送使府大軍行至汝曹居寨中者速如我出降立得為良人無事矣至穿口句胡僧置十一寨寨中人爭出降胡僧大驚拔劍遏之衆投瓦石擊之共擒以獻仁厚其衆

五千餘人皆降又明日焚寨使降者執旗先驅一如雙  
流至新津韓求置十三寨皆迎降求自投深塹其衆鉤  
出之已死斬首以獻明日仁厚縱雙流穿口降者先歸  
使新津降者執旗前驅且曰入邛州境亦可散歸矣羅  
夫子置九寨於延貢其衆前夕望新津火光已不眠矣  
及新津人至羅夫子脫身棄寨奔阡能其衆皆降明日  
羅夫子至阡能寨與之謀悉衆決戰計未定日向暮延  
貢降者至阡能羅夫子走馬巡寨欲出兵衆皆不應仁

厚引兵連夜逼之明旦諸寨知大軍已近呼譟爭出執  
阡能阡能窘急赴井為衆所擒不死又執羅夫子羅夫  
子自到衆挈羅夫子首縛阡能驅之前迎官軍見仁厚  
擁馬頭大呼泣拜曰百姓負寃日久無所控訴自謀者  
還百姓引領度頃刻如朞年今遇尚書如出九泉賜白  
日已死而復生矣謹呼不可止賊寨在它所者分遣諸  
將往降之仁厚出軍凡六日五賊皆平

宋曹彬遣人謂江南主曰事勢如此所惜者一城生聚

耳若能歸命策之上也某日城必破宜早為之  
所江南主不聽一日彬忽稱疾不視事諸將皆  
來問疾彬曰余之疾非藥石所能愈惟須諸君  
誠心自誓以克城之日不妄殺一人則自愈矣  
諸將許共焚香為誓明日彬即稱愈又明日城  
陷初陳喬張洎約同死社稷然洎實無死志至  
是喬徑入白江南主曰此日國亡願加顯戮以  
謝國人江南主曰此乃厯數卿死無益也喬曰

縱不殺臣臣何面目以見士人乎遂自經死勤政  
殿學士鍾倩朝服坐于家兵及門亦舉族死之江  
南主率臣僚詣軍門請罪彬慰安之待以賓禮  
請煜入宮治裝彬以數騎待宮門外左右密謂彬曰  
煜入或不測柰何彬笑曰煜素僂無斷既已降必  
不能自引決煜治裝畢遂與其宰相湯悅等四十  
五人赴汴京彬自出師至凱旋士衆畏服無敢輕  
肆克城之日兵不血刃

處勝六則

鄖陵之役晉伐鄭荆救之欒武子將上軍范文子將下軍欒武子欲戰范文子不欲曰吾聞之唯厚德者能受多福無德而服者衆必自傷也稱晉之德諸侯皆叛國可以少安唯有諸侯故擾擾焉凡諸侯難之本也且唯聖人能無外患又無內憂距非聖人不有外患必有內憂盍姑釋荆與鄭以為外患乎諸臣之內相與必將輯睦今我戰又勝荆與鄭吾君將伐知而多力怠教而重

歛大其私暱而益婦人田不奪諸大夫田則焉取以益此諸臣之委室而徒退者將與幾人戰若不勝則晉國之福也戰若勝亂地之秩者也其產將害大盍姑無戰乎樂武子曰昔韓之役惠公不復舍邲之役三軍不振旅箕之役先軫不復命晉國固有大恥三今我任晉國之政不損晉恥又以違蠻夷以重之雖有後患非吾所知也范文子曰擇福莫若重擇禍莫若輕福無所用輕禍無所用重晉國固有大恥與其君臣不相聽以為諸

侯笑也盍姑以違蠻夷為恥乎樂武子不聽遂與荆人戰於鄢陵大勝之於是乎君伐知而多力怠教而重歛大其私暱殺三郤而戶諸朝納其室以分婦人於是乎國人弗蠲遂殺諸翼葬之翼東門之外以車一乘厲公之所以死者唯無德而功烈多服者衆也厲公將伐鄭范文子不欲曰若以吾意諸侯皆畔則晉可為也唯有諸侯故擾擾焉凡諸侯難之本也得鄭憂滋長安用鄭郤至曰然則王者多憂乎文子曰我王者也乎哉夫

王者成其德而遠人以其方賄歸之故無憂今我寡德而求王者之功故多憂子見無土而欲富者樂乎哉

鄢陵之役大夫欲爭鄭范文子不欲曰吾聞人臣者能內睦而後圖外不睦內而圖外必有內爭盍始謀睦乎考訊其阜以出則怨靖 反自鄢范文子謂其宗祝曰君驕泰而有烈夫以德勝者猶懼失之而況驕泰乎君多私今以勝歸私必昭昭私難必作吾恐及焉凡吾宗祝為我祈死先難為免七年夏范文子卒冬難作始於

三郤卒於公

趙襄子使新穉穆子伐翟勝左人中人遽人來告襄子  
將食尋飯有恐色侍者曰狗之事大矣而主色不怡何  
也襄子曰吾聞之德不純而福祿並至謂之幸夫幸非  
福非德不當雖雖不為幸吾是以懼

蘇厲謂周君曰敗韓魏殺犀武攻趙取闐離石祁者皆  
白起是功用兵又有天命也今攻梁梁必破破則周危  
君不若止之謂白起曰楚有養由基者善射去柳葉者

百步而射之百發百中左右皆曰善有一人過曰善射可教射也矣養由基曰人皆善子乃曰可教射子何不代我射之也客曰我不能教子支左屈右夫射柳葉者百發百中而不以善息少焉氣力倦弓撥矢鉤一發不中前功盡矣今公破韓魏殺犀武而北攻趙取藺離石祁者公也公之功甚多今公又以秦兵出塞過兩周踐韓而以攻梁一攻而不得前功盡滅公不若稱病不出也

昭陽為楚伐魏覆軍殺將得八城移兵而攻齊陳軫為齊王使見昭陽再拜賀戰勝起而問楚之法覆軍殺將其官爵何也昭陽曰官為上柱國爵為上執珪陳軫曰異貴於此者何也曰唯令尹耳陳軫曰令尹貴矣主非置兩令尹也臣竊為公譬可也楚有祠者賜其舍人卮酒舍人相謂曰數人飲之不足一人飲之有餘請畫地為蛇先成者飲酒一人蛇先成引酒且飲乃左手持卮右手畫蛇曰吾能為之足未成一人之蛇成奪其卮曰

蛇固無足子安能為之足遂飲其酒為蛇足者終亡其  
酒今君相楚而攻魏破軍殺將得八城不弱兵欲攻齊  
齊畏公甚公以是為名亦足矣官之上非可重也戰無  
不勝而不知止者身且死爵且後歸猶為蛇足也昭陽  
以為然解軍而去

田單為齊上將軍興師十萬將以攻翟往見魯仲連子  
仲連子曰將軍之攻翟必不能下矣田將軍曰單以五  
里之城十里之郭復齊之國何為攻翟不能下去上車

不與言決攻翟三月而不能下齊嬰兒謠之曰大冠如  
箕長劍柱頤攻翟不能下壘于梧丘于是田將軍恐駭  
往見仲連子曰先生何以知單之攻翟不能下也仲連  
子曰夫將軍在即墨之時坐則織簣立則杖車為士卒  
倡曰宗廟亡矣魂魄喪矣歸何黨矣故將有死之心士  
卒無生之氣今將軍東有掖邑之封西有淄上之寶金  
銀橫帶馳騁乎淄澗之間是以樂生而惡死也田將軍  
明日結髮徑立矢石之所乃引枹而鼓之翟人下之故

將者士之心也士者將之肢體也心猶與則肢體不用  
田將軍之謂乎

呂覽慎大篇

賢主愈大愈懼愈彊愈恐凡大者小鄰

國也彊者勝其敵也勝其敵則多怨小鄰國則多患多  
患多怨國雖彊大惡得不懼惡得不恐故賢主於安思  
危於達思窮於得思喪周書曰若臨深淵若履薄冰以  
言慎事也桀為無道暴戾頑貪天下顛恐而患之言者  
不同紛紛分分其情難得千辛任威凌轢諸侯以及兆

民賢良鬱怨殺彼龍逢以服羣凶衆庶泯泯皆有遠志  
莫敢直言其生若驚大臣同患弗周而畔桀愈自賢矜  
過善非主道重塞國人大崩湯乃惕懼憂天下之不寧  
欲令伊尹往視曠夏恐其不信湯由親自射伊尹伊尹  
奔夏三年反報于毫曰桀迷惑於末嬉好彼琬琰不恤  
其衆衆志不堪上下相疾民心積怨皆曰上天弗恤夏  
命其卒湯謂伊尹曰若告我曠夏盡如詩湯與伊尹盟  
以示必滅夏伊尹又復往視曠夏聽於末嬉末嬉言曰

今昔天子夢西方有日東方有日兩日相與鬪西方日勝東方日不勝伊尹以告湯商涸旱湯猶發師以信伊尹之盟故令師從東方出於國西以進未接刃而桀走逐之至大沙身體離散為天下戮不可正諫雖後悔之將可柰何湯立為天子夏民大說如得慈親朝不易位農不去疇商不變肆親郭如夏此之謂至公此之謂至安此之謂至信盡行伊尹之盟不避旱殃祖伊尹世世享商武王勝殷入殷未下舉命封黃帝之後於鑄封帝

堯之後於黎封帝舜之後於陳下舉命封夏后之後於杞立成湯之後於宋以奉桑林武王乃恐懼太息流涕命周公旦進殷之遺老而問殷之亡故又問衆之所說民之所欲殷之遺老對曰欲復盤庚之政武王於是復盤庚之政發巨橋之粟賦鹿臺之錢以示民無私出拘救罪分財棄責以振窮困封比干之墓靖箕子之宮表商容之間士過者趨車過者下三日之內與謀

之士封為諸侯諸大夫賞以書社庶士施政去賦然後於濟河西歸報於廟乃稅馬於華山稅牛於桃林馬弗復乘牛弗復釁鼓旗甲兵藏之府庫終身不復用此武王之德也故周明堂外戶不閉示天下不藏也唯不藏也可以守至藏武王勝殷得二虜而問焉曰若國有妖乎一虜對曰吾國有妖晝見星而天雨血此吾國之妖也一虜對曰此則妖也雖然非其大者也吾國

之妖甚大者子不聽父弟不聽兄君令不行此妖之  
大者也武王避席再拜之此非貴虜也貴其言也趙  
襄子攻翟勝老人中人使使者來謁之襄子方  
食搏飯有憂色左右曰一朝而兩城下此人之  
所以喜也今君有憂色何襄子曰江河之大也  
不過三日飄風暴雨日中不須臾今趙氏之德  
行無所於積一朝而兩城下亡其及我乎孔子聞  
之曰趙氏其昌乎夫憂所以為昌也而喜所以為

亡也勝非其難者也持之其難者也賢主以此持勝故其福及後世齊荆吳越皆嘗勝矣而卒取亡不達乎持勝也唯有道之主能持勝孔子之勁舉國門之闕而不肯以力聞墨子為守攻公輸般服而不肯以兵加善持勝者以術彊弱

不可恃二則附

管子樞言篇 凡國之亡也以其長者也人之

自失也以其所長者也故善游者死於梁池善射者死於中野食屬於食治屬於事無善事而有善治者自古及今未嘗之有也

或謂魏王曰昔曹恃齊而輕晉齊伐釐莒而晉人亡曹繒恃齊而輕越齊和子亂而越人亡繒鄭恃魏以輕韓魏伐榆闢而韓氏亡鄭原恃秦翟以輕晉秦翟年穀大凶而晉人亡原中山恃齊魏以輕趙齊魏伐楚而趙亡中山此五國所以亡者皆有所恃也非獨此五國為然

而已也天下之亡國皆然矣夫國之所以不可恃者多其變不可勝數也或以政教不修上下不輯而不可恃者或有諸侯鄰國之虞而不可恃者或以年穀不登畜積竭盡而不可恃者或化於利比於患臣以此知國之不可必恃也今王恃楚之強而信春申君之言以是賓秦而久不可知即春申君有變是王獨受秦患也即王有萬乘之國而以一人之心為命也臣以此為不完願王之熟計之也

輕敵二則 騎兵二則併

秦昭王謂左右曰今日韓魏孰與始強對曰弗如也王曰今之如耳魏齊孰與孟嘗芒卯之賢對曰弗如也王曰以孟嘗芒卯之賢帥強韓魏之兵以伐秦猶無內寡人何也今以無能之如耳魏齊帥弱韓魏以攻秦其無柰寡人何亦明矣中期堆琴對曰王之料天下過矣昔者六晉之時智氏最强滅破范中行又帥韓魏以圍趙襄子於晉陽決晉水以灌晉陽城不沈者三板耳智伯

出行水韓康子御魏桓子驂乘智伯曰始吾不知水之可亡人之國也乃今知之汾水利以灌安邑絳水利以灌平陽魏桓子肘韓康子康子履魏桓子躡其踵肘足接於車上而智氏分矣身死國亡為天下笑今秦之强不能過智伯韓魏雖弱尚賢其在晉陽之下也此乃方其用肘足時也願王之勿易也

或謂秦王曰臣竊惑王之輕齊易楚而卑畜韓也臣聞王兵勝而不驕霸主約而不忿勝而不驕故能服世約

而不忿故能從鄰今王廣德魏趙而輕失齊驕也戰勝宜陽不恤楚交忿也驕忿非霸王之業也臣竊為大王慮之而不取也詩云靡不有初鮮克有終故先王之所重者唯終與始何以知其然也昔智伯瑤殘范中行圍晉陽卒為三家笑吳王夫差樓越於會稽勝齊於艾陵為黃池之遇無禮於宋遂為勾踐禽死梁君伐楚勝齊制韓趙之兵驅十二諸侯以朝天子於孟津後子死身布冠而拘於秦三者非無功也能始而不能終也今王

破宜陽殘三川而使天下之士不敢言雍天下之國徙  
兩周之疆而世主不敢窺陽侯之塞取黃棘而韓楚之  
兵不敢進王若能為此尾則三王不足四五霸不足六  
王若不能為此尾而有後患則臣恐諸侯之君河濟之  
士以王為吳智之事也詩云行百里者半於九十此言  
末路之難今大王皆有驕色以臣之心觀之天下之事  
依世主之心非楚受兵必秦也何以知其然也秦人援  
魏以拒楚楚人援韓以拒秦四國之兵敵而未能復戰

也齊宋在繩墨之外以為權故曰先得齊宋者伐秦秦先得齊宋則韓氏鑠韓氏鑠則楚孤而受兵也楚先得之則魏氏鑠魏氏鑠則秦孤而受兵矣若隨此計而行之則兩國者必為天下笑矣

楚屈瑕伐羅鬪伯比送之還謂其御曰莫教必敗舉趾高心不固矣遂見楚子曰必濟師楚子辭焉入告夫人鄧曼鄧曼曰大夫其非衆之謂其謂君撫小民以信訓諸司以德而威莫教以刑也莫教狃於蒲騷之役將自

用也必小羅君若不鎮撫其不設備乎夫固謂君訓衆而好鎮撫之召諸司而勸之以令德見莫敖而告諸天之不假易也不然夫豈不知楚師之盡行也楚子使賴人追之不及莫敖使徇于師曰諫者有刑及駟亂次以濟遂無次且不設備及羅羅與盧戎兩軍之大敗之莫敖縊于荒谷羣帥囚于治父以聽刑楚子曰孤之罪也皆免之

秦師將襲鄭過周北門左右免胄而下超乘者三百乘

王孫滿觀之言於王曰秦師必有譴王曰何故對曰師輕而驕輕則寡謀驕則無禮無禮則脫寡謀自陷入險而脫能無敗乎秦師無讐是道廢也是行也秦師還晉人敗諸殲獲其三帥丙術視驕兵二則併

縱敵

四則附

吳王夫差敗越于夫椒報檇李也遂入越越子以甲楯五千保于會稽使大夫種因吳大宰嚭以行成吳子將許之伍員曰不可臣聞之樹德莫如滋去疾莫如盡昔

有過澆殺斟灌以伐斟鄩滅夏后相后縉方娠逃出自竇歸于有仍生少康焉為仍牧正惎澆能戒之澆使椒求之逃奔有虞為之庖正以除其害虞思於是妻之以二姚而邑諸綸有田一成有衆一旅能布其德而兆其謀以收夏衆撫其官職使女父諜澆使季杼誘殼遂滅過戈復禹之績祀夏配天不失舊物今吳不如過而越大於少康或將豐之不亦難乎句踐能親而務施施不失人親不棄勞與我同壤而世為仇讎於是乎克而弗

取將又存之違天而長寇讎後雖悔之不可食已姬之  
哀也日可俟也介在蠻夷而長寇讎以是求伯必不行  
矣弗聽退而告人曰越十年生聚而十年教訓二十年  
之外吳其為沼乎三月越及吳平吳入越不書吳不告  
慶越不告敗也 吳王夫差乃告諸大夫曰孤將有大  
志於齊吾將許越成而無拂吾慮若越既改吾又何求  
若其不改反行吾振旅焉申胥諫曰不可許也夫越非  
實中心好吳也又非懼畏吾甲兵之彊也大夫種勇而

善謀既還玩吳國於股掌之上以得其志夫固知君王之益威以好勝也故婉約其辭以從逸王志使淫樂於諸夏之國以自傷也使吾甲兵鈍弊民人離落而日以憔悴然後安受吾燼夫越王好信以愛民四方歸之年穀時熟日長炎炎及吾猶可以戰為虺弗摧為蛇將若何吳王曰大夫奚隆於越越曾足以爲大虞乎若無越則吾何以春秋曜吾軍士乃許之成將盟越王又使稽郢辭曰以盟為有益乎前盟口血未乾足以結信矣

以盟為無益乎君王舍甲兵之威以臨使之而胡重於鬼神而自輕也吳王乃許之荒成不盟吳王夫差既許越成乃大戒師徒將以伐齊申胥進諫曰昔天以越賜吳而王弗受夫天命有反今越王句踐恐懼而改其謀舍其愆令輕其征賦施民所善去民所惡身自約也裕其衆庶其民殷衆以多甲兵譬越之在吳也猶人之有腹心之疾也夫越王之不忘敗吳於其心也戚然服士以伺吾間今王非越是圖而齊魯以為憂夫齊魯諸

疾疥癬也豈能涉江淮而與我爭此地哉將必越實有  
吳土王盍亦鑑於人無鑑於水昔楚靈王不君其臣箴  
諫以不入乃築臺於章華之上闢為石郭陂漢以象帝  
舜罷獎楚國以間陳蔡不修方城之內踰諸夏而圖東  
國三歲於沮汾以服吳越其民不忍饑勞之殃三軍叛  
王於乾谿王親獨行屏營傍徨於山林之中三日乃見  
其涓人疇王呼之曰余不食三日矣疇趨而進王枕其  
股以寢於地王寐疇枕王以墣而去之王覺而無見也

乃匍匐將入棘闈不納乃入芋尹申亥氏焉王縊申亥  
負王以歸而土埋之其室此志也豈遽忘於諸侯之耳  
乎今王既變鯀禹之功而高高下下以罷民於始蘇天  
奪吾食都鄙荐飢今王將狠天而伐齊夫吳民離矣體  
有所傾譬如羣獸然一个負矢將百羣皆奔王其無方  
收也越人必來襲我王雖悔之其猶有及乎王弗聽十  
二年遂伐齊齊人與戰於艾陵齊師敗績吳人有功吳  
王夫差既勝齊人於艾陵乃使行人奚斯釋言於齊曰

寡人帥不腆吳國之役遵汶之上不敢左右唯好之故  
今大夫國子興其衆庶以犯獵吳國之師徒天若不知  
有臯則何以使下國勝 吳王將伐齊越子率其衆以  
朝焉王及列士皆有饋賂吳人皆喜唯子胥懼曰是豢  
吳也夫諫曰越在我心腹之疾也壞地同而有欲於我  
夫其柔服求濟其欲也不如早從事焉得志於齊猶獲  
石田也無所用之越不為沼吳其泯矣使醫除疾而曰  
必遺類焉者未之有也盤庚之誥曰其有顛越不共則

剗殄無遺育無俾易種于茲邑是商所以興也今君易之將以求大不亦難乎弗聽使於齊屬其子於鮑氏為王孫氏反役王聞之使賜之屬鏤以死將死曰樹吾墓檣檣可材也吳其亡乎三年其始弱矣盈必毀天之道也

無備

五則附

晉侯使申公巫臣如吳假道于晉與渠丘公立於池上曰城已惡晉子曰辟陋在夷其孰以我為虞對曰夫狡

焉思啓封疆以利社稷者何國蔑有唯然故多大國矣  
唯或思或縱也勇夫重閉況國乎冬十一月楚子重自  
陳伐莒圍渠丘渠丘城惡衆潰奔莒戊申楚入渠丘莒  
人囚楚公子平楚人曰勿殺吾歸而俘莒人殺之楚師  
圍莒莒城亦惡庚申莒潰楚遂入郢莒無備故也君子  
曰恃陋而不備罪之大者也備豫不虞善之大者也莒  
恃其陋而不修城郭浹辰之間而楚克其三都無備也  
夫詩曰雖有絲麻無棄菅蒯雖有姬姜無棄蕉萃凡百

君子莫不代匱言備之不可已也

楚靈王即位欲為霸會諸侯使椒舉如晉求諸侯椒舉致命曰寡君使舉曰君有惠賜盟于宋曰晉楚之從交相見也以歲之不易寡人願結驩于二三君使舉請問君若苟無四方之虞則願假寵以請於諸侯晉君欲勿許司馬疾曰不可楚王方侈天其或者欲盈其心以厚其毒而降之罰未可知也其使能終亦未可知也唯天所相不可與爭君其許之修德以待其歸若歸於德吾

猶將事之況諸侯乎若適淫虐楚將棄之吾誰與爭公  
曰晉有三不殆其何敵之有國險而多馬齊楚多難有  
是三者何嚮而不濟對曰恃馬與險而虞隣之難是三  
殆也四嶽三塗陽城大室荆山終南九州之險也是不  
一姓冀之北土馬之所生也無興國焉恃險與馬不足  
以為固也從古以然是以先王務德音以享神人不聞  
其務險與馬也或多難以固其國開其疆土或無難以  
喪其國失其守宇若何虞難齊有仲孫之難而獲桓公

至今賴之晉有里克之難而獲文公是以為盟主衛邢  
無難狄亦喪之故人之難不可虞也恃此三者而不脩  
政德亡於不暇有何能濟君其許之紂作淫虐文王患  
和殷是以實周是以興夫豈爭諸侯哉乃許楚靈王遂  
為申之會與諸侯伐吳起章華之臺為乾谿之役百姓  
罷勞怨懟於下羣臣倍畔於上公子棄疾作亂靈王亡  
逃卒死於野故曰晉不頓一戟而楚人自亡司馬侯之  
謀也

梁侯景攻歷陽太守莊鍼以城降因說景曰國家承平  
歲久人不習戰聞大王舉兵內外震駭宜乘此際速趨  
建康可兵不血刃而成大功若使朝廷徐得為備內外  
小安遣羸兵千人直據采石大王雖有精甲百萬不得  
濟矣景乃留郭駱守歷陽以鍼為導引兵臨江江上鎮  
戍相次啓聞武帝問討景之策於都官尚書羊侃侃請  
以二千人急據采石令邵陵王襲取壽陽使景進不得  
前退失巢穴烏合之衆自然瓦解朱异曰景必無渡江

之志遂寢其議乃以臨賀王正德都督京師諸軍事屯丹陽郡正德遣大船數十艘詐稱載荻密以濟景景自橫江濟于采石有馬數百匹兵八千人是夕朝廷始命戒嚴

隋軍臨江陳後主詔以散騎常侍周羅睺都督巴峽緣江諸軍事以拒之楊素引舟師下三峽軍至流頭灘將軍戚昕以青龍百餘艘兵數千人守狼尾灘地勢險峭隋人患之素曰勝負大計在此一舉若晝日下船彼見

我虛實灘流迅激制不由人則吾失其便不如以夜掩之素親帥黃龍數千艘銜枚而下遣王長襲引步卒自南岸擊昕別柵大將軍劉仁恩帥甲騎自北岸趣白沙擊之昕敗走素帥水軍東下舟艤被江旌甲曜日素坐平乘大船容貌雄偉陳人望之皆懼曰清河公即江神也江濱鎮戍聞隋軍將至相繼奏聞施文慶沈客卿並抑而不言及隋軍臨江間譟驟至長城公從容謂侍臣曰王氣在此齊兵三來周師再來無不摧敗彼何為者

邪都官尚書孔範曰長江天塹古以為限隔南北今日  
虜軍豈能飛渡邪邊將欲作功勞妄言事急長城公以  
為然故不為深備奏伎縱酒賦詩不輒

柴紹與吐谷渾戰為其所圍虜乘高射之矢下如雨紹  
遣人彈胡琵琶二女子對舞虜怪之駐弓矢相與聚觀  
紹察其無備潛選精騎出虜陳後擊之虜大潰

唐昭宗時崔胤假朱全忠兵力以誅宦官全忠既破李  
茂貞并吞關中威震天下遂有篡奪之志胤懼與全忠

外雖親厚私心漸異乃謂全忠曰長安密邇茂貞不可不為守禦之備六軍十二衛但有空名請召募以實之使公無西顧之憂全忠知其意曲從之陰使麾下壯士應募以察其變脣不之知與鄭元規等繕治兵仗日夜不息及朱友偏死全忠益疑脣且欲遷天子都洛恐脣立異密令宿衛都指揮使朱友諒以兵圍崔脣第殺脣及鄭元規陳班并脣所親厚者

經濟類編卷六十五